

說

郭

續

說郛續目錄

引第二十三

兒世說

趙瑜

香案牘

陳繼儒

女俠傳

鄒之麟

貧七傳

黃姬水

兒世說

天水趙瑜

屬對

屠金龍

金龍五歲同弟召見帝以果分賜金對曰一盂果子
賜五歲之神童曰三尺草芥對萬年之天子

王恭

文恪兒時學于舅氏媿遣婢饋茶公戲執其手舅聞
試之曰奴手爲拏此後莫拏奴手公曰人言是信從

兒世說

八

一

今母信人言

李東陽

文正舉神童入朝不能踰門限 帝曰神童足短曰
天子門高 帝置之膝上時父伏丹陛 帝曰子坐
父立禮乎曰嫂溺叔援權也

程敏政

隼墩舉神童李賢許字以女指席開果試曰因荷而
得藕曰有杏不須梅

言語

王粲

粲數歲時客有以一獐一鹿同籠以獻問粲何者是
獐何者爲鹿曰獐邊者是鹿鹿邊者是獐

徐樞

樞九歲嘗月下戲人語之曰若令月中無物當極明
耶曰不然譬如人眼中有瞳子無此必不明

楊億

億十歲太宗召見謂曰卿久離鄉里得無念父母乎
曰臣見陛下一如臣父母

劉晏

晏七歲爲正字入禁中起居貴妃妃置膝上親爲畫眉總髻上問曰卿爲正字正得幾字曰天下字皆正惟朋字未正

排調

何晏

晏八歲顧良戲曰汝姓是荷葉之荷爲河水之河曰先生姓顧是眷顧之顧爲新故之故

張玄之

玄之八歲勅齒先達戲之曰君口中何爲開狗竇曰
正使君輩從此中出入

江從簡

從簡小時有文情作採荷調以刺何敬容曰欲持荷
作桂荷弱不勝梁欲持荷作鏡荷暗本無光敬容不
覺唯歎其工

文學

庾子輿

子輿五歲讀孝經手不釋卷或曰此書文句不多何

用自苦曰孝德之本何謂不多

宗懔

懔少聰敏好讀書語輒引古事鄉里呼爲小兒學士

祖瑩

瑩少耽書父母恐其成疾禁之密于灰中藏火父母寢然後燃火讀書先以衣被蔽窻戶恐漏火光爲人所覺外呼爲聖小兒

注

孤六歲依外家貧無以資給注乃廝於園中燃

新寫書誦讀

劉歆

歆十二讀莊子逍遙篇曰此可解耳客問之隨問而答皆有情理

王敬仁

敬仁十三作真人論長史送示真長真長答云見敬仁所作論便足參微言

楊烏

子雲言吾家童烏九歲預吾玄文

楊炯

炯中童子科授校書郎十一待制弘文館

謝幾卿

幾卿十二補國子生齊文惠太子自臨策試辨釋無
滯

劉宴

玄宗封泰山安八歲獻頌命張說試之說曰國瑞也

授太子正字

賈黃中

黃中六歲知臺閣事七歲神童及第父嘗取書與其
身等高令誦之謂之等身書

陶弘景

弘景四歲以荻爲筆畫灰中學書

疆記

長孫紹遠

紹遠十三王碩試以月令誦一遍誦之若流

虞荔

荔九歲陸倕問以五經十事對無遺失

賈逵

逵五歲不能言其姊每携聽隣塾讀書輒默識後一
能言便誦之如流

王粲

粲十四誦道邊碑背誦不失一字

應奉

奉兒時凡所經履莫不暗記

昭明太子

昭明五歲能讀五經顧野王七歲讀五經張九成八

歲誦六經

至性

范宣

宣年八歲後園挑菜誤傷指大啼人問痛邪曰非爲痛身體髮膚不敢毀傷是以啼耳

袁君正

正數歲父疾晝夜專侍人勸暫休曰尊患未瘥眠亦不安

王充

充兒時不妄狎儕倫不掩雀捕蟬

劉殷

殷九歲因母思董號於澤中得董數斛又於籬下得
十五鍾粟

駱統

統八歲年饑統飲食哀少曰士大夫糟糠不足我何
心獨飽

王修

修七歲喪母母以社日亡來歲隣里修社會修感念

亡母哀甚初喪隣里爲之罷社

鮮于文宗

文宗七歲喪父父以種芋時亡明年對芋嗚咽如此
終身

殷陶

陶十二喪父有長蛇帶其門舉家奔走陶以柩在獨
居廬不動

黃香

香九歲失母思慕憔悴事父夏則扇其枕簟冬則溫

其被薦京師號曰天下無雙江夏黃童

楊香

香十四嘗隨父獲父忽爲虎曳去時香手無寸鐵乃
搃持虎頸虎驚逝父得免

宿食舒

舒自賣與王氏得大麥九斛以養母纔七歲後官上
黨太守

膳識

岳柱

柱八歲觀畫師何澄畫陶母剪髮圖指陶母手中金
針詰之曰此可易酒何川剪髮澄大驚

司馬光

公幼與羣兒戲一兒墮水甕中羣兒驚走公取石破
其甕卽得出

文彥博

潞公幼與羣兒擊毬毬蹴人柱穴中公以水灌之毬
浮卽出

荀攸

攸祖曇廣陵太守卒故吏張權求守曇墓時攸年十
三疑之謂其叔曰此吏有非常之色殆將有姦乎推
問果亡命者

自新

蕭思詰

思詰十歲好騎屋棟打細腰鼓隣曲患之後折節有
令堅

恬裕

陶季直

季直四歲祖父以四兩銀列置前令諸孫各取一季直獨不取曰若有賜當先父伯不應度及諸孫

王泰

泰數歲時祖母散棗栗於牀羣兒競取之泰獨不動媪問之曰不取自當得賜

孔融

融四歲與兄食梨輒引小者人問之曰小兒法當取小者

宋虞愿

虞愿四歲中庭橘熟人競取之愿獨恬然

方正

何晏

晏七歲明惠若神魏武竒愛之因晏在宮內欲以爲子晏乃畫地令方自處其中人問之曰何氏之廬也魏武知之卽遣還

杜根

根十三入太學號竒童貴戚爭遺之書竝不發壁藏之及後捕按貴戚賓客書封如故

張元

元六歲祖將元就井洛元固不肯日不能褻露其形於白日之下

師友

荀爽

爽十二通春秋論語喬玄見而稱之曰可爲人師

魏照

董子魏照求事郭泰供給灑掃日經師易遇人師難遭欲以素絲之質附近朱藍

言志

李宗諤

宗諤七歲恥以父任得官後舉進士三館兩制不數年如父職

郭泰

泰十四母使給事縣庭泰曰大丈夫安能斗筲之役乎乃遊京師

陳蕃

蕃少庭宇不掃薛勤曰孺子何不灑掃以待賓客曰

大丈夫當掃除天下安事一室乎

獨孤及

及兒時讀孝經父曰兒志何語曰立身行道揚名於後世

宗慤

元幹小時叔父少文問其所志曰愿乘長風破萬里浪

褚淵

淵生母求寶物於嬪母淵曰但令淵在何患無寶後

見世說

爲司徒

賞譽

王儉

儉幼爲學叔僧虔曰我不思此兒無名政恐名太盛耳袁粲見之曰宰相之材也栢栢豫章雖小已有棟梁氣矣

王僧祜

僧祜少使聰悟叔父景玄撫其首曰兒神明意用當不作率爾人

謝安

安四歲桓彝曰此兒風神秀異當繼縱王東海

李禮成

禮成七歲其姑曰此兒平生未嘗回顧異日必爲重器

索琳

琳八歲父靖曰吾兒廊廟之才州郡吏不足污吾兒也

劉孝綽

長史幼聰敏王融深賞異之嘗歎曰天下文章若無
我當歸阿士

異徵

張鷟

鷟五歲夢大鳥五采降於家占云文章瑞國

江淹

淹十三於樵所得貂蟬將鬻以供母母止之曰此汝
休徵也

關澤

薄十三夢見名字炳然在月中

徐陵

陵數歲家人攜候寶誌誌摩其頂曰此天上石麒麟也

李嶠

嶠兒時夢人以雙筆贈文日有名

豪豪

傅亮

亮四歲能解衣與人無吝邠超稱其才名過乃父

兒世說

八

十三

魯肅

肅十五好爲奇計周瑜提兵過候肅併求資糧肅家有二困米三千斛指與瑜遂相結納去

荀美

美七歲蘇峻亂美隨父在石頭峻愛之置膝上美還謂母曰得一利刃于足以殺賊母卽掩其口

將畧

錢鏐

鏐幼與羣兒戲大木下坐大石指麾羣兒爲隊伍號

今有法

曹彬

彬週歲日父母以百玩之具羅于前觀其所取以覘終身之業彬左手提千戈右手取俎豆斯須取一印餘無所視後爲樞密使相

訛漏

李嶠兒

中宗召蘇頲及嶠子時皆同年帝曰汝等各以所適書取宜奏者言之頲曰木從繩則正后從諫則聖李

日斷朝涉之脛剖賢人之心帝曰蘇瓌有子李嶠無
兒

香案牘序

甲午三月邵文學就試荆溪余出城南讀書孟直夫
郊居不五日而客有跡者挈鼎相餽余與客班坐樹
下視樹影所至輒起遷席風日淡宕則枕籍紅花田
以隱囊博山酒鎗佐之有古陶斗柄如鸚鵡啄腹如
瓠丹砂繡蝕厚如指甲者數片班班桃花色而斟酒
有異香蓋三代物也出以酌酒客爲引滿已忽聞林
端反舌聲時改夏矣而聲小益余戲指之曰何異文
通才盡又笑曰豈老氏多言數窮耶客亦大笑醉去

余與直夫退而相對起居無恒時憩磯頭橋畔布衲
寬博落落不知何如人村中父老小兒習余無他則
剪薔薇花縛蔬笋饋余余愧謝不能當已復余山人
又摘茶寄余試以惠泉絳碧沁齒蕉衣竹粉娵娵北
窻爲枕書而臥臥起抽一編讀之則浮雲山道士仙
史在焉出道藏馱字由卷三十有二所載古今真人
列仙四百四十有七顧其言不雅馴余與直夫汰而
洗之存其奇逸可喜者精爲一卷以資麈尾其名香
案牘者何居曰仙履玉宸吏司之如項羽所謂書不

通記名姓而已清懶居士陳繼儒志

香案牘

雲間陳繼儒

軒轅

帝列珠玉于蘭蒲席上春雜寶爲屑以沉榆之膠和
之爲泥畫野分州別尊卑華戎之異濟南人獻明堂
圖複道上有樓從西南入此樓之始蟻結大如牛羊
蟻大如虹以應上德

尹喜

文始先生生室中陸地生蓮花結草爲樓精思至道

范蠡

蠡好服桂飲水實藥蘭陵於北邙山得仙異

鬼谷

秦時疫死者有烏如烏銜草覆其面遂活有司上聞
始皇遣使賞草以問先生云此瓊田中養神芝其葉
似菰而不藜生一葉能起一人

介推

子推與趙宣子遊且有黃雀在門上晉公重耳異之
後見東海邊爲王俗翁賣扇

陸通

楚狂接輿好食橐盧木實及蕪菁子在峩眉山

鹿皮翁

峩山頂有泉人不能到鹿皮翁作轉輪懸閣梯道四
間上其巔

阮丘

丘耳長七寸口中無齒

玄俗

俗日中無影

白石生

生煑白石爲糧問之何不霞舉笑曰天上多有至尊相奉事更苦于人間爾時號爲隱遯仙人

宋來子

來子常洒掃一市

古丈人

嵩華松下古丈人一女子二日老人秦之役者女宮人合爲殉幸脫驪山之禍匪此

董謁

謁乞犬羊皮爲裘編荆爲牀聚烏獸毛而寢性好異
書見輒題掌還家以片符寫之舌黑掌爛人謂謁寧
錄而舌學

季充

充號負圖先生伏生十歲就石壁中受充尚書授四
代之事伏生以繩繞腰領一讀一結十尋之繩皆成
結矣充餌菊米經旬不語人問何以答曰世間無可
食亦無可語者

孟岐

岐嶷云見周公旦抱成王以朝于周廟岐時侍周公
陞壇公上岐以手摩成王足周公以玉笏遺岐岐常
寶執笏以承袂拂拭笏笏今鏡欲折耳

黃安

安坐一神龜廣三人行則負龜而趨曰伏羲氏始造
網罟獲龜以授我背已平此龜畏日月光三千年一
出頭我坐此以來龜出者五矣

涉正

正開日二十年弟子固請之正乃開目有聲如霹靂

而閃光若電已復還開

孫博

博口中吐火指樹火生葉旋焦枯又能于水面布席
作樂使衆人舞于上不沒不濡引鏡爲刀屈刀成鏡
積時不改

班孟

孟坐空虛中與人語又能入地初沒足至腰及胛漸
漸但餘冠鬢良久盡沒又吸人屋上瓦瓦飛入簷楣
紛如落葉

柳融

融取杯咒成龜煮之可食腸臟皆具而杯成龜殼煮
取肉則殼還成杯矣

王興

秋長山洞穴中有千歲金蟾蛤山頂有瓊花木徑八
九尺葉如白檜花如芙蓉香聞數里興常見之

桐君

君入山得鳴石雞舂碎爲藥服之有聲氣雞色丹大
如燕常在地中應時而鳴吳寶鼎元年貢琥珀燕置

靜室室中時一鳴翔此之類也

趙丙

丙舟行遇人酌水爲酒劑一椀爲脯並得醉飽

王喬

武陽北平山有白蝦蟆謂之肉芝王喬食以仙去武陽山祠有三王喬一太子晉一葉令王喬一食肉芝王喬

周大賓

賓善鼓琴彈獨絃而八音自和以教康長生孫廣用

廣川卽孫登也

安期生

生以醉墨洒石上皆成桃花

彭宗

宗能以一氣誦五千文通爲兩過音清暢

司馬季主

季主顏如少女鬚三尺黑如墨有子二男名法育女名濟華俱在委羽山

王探

探師司馬季主與人行身散雲霧或屹立平地俄起
崇山

章玉子

玉子含水噴成珠玉與弟子行各九泥為馬來之一
日行千里

唐公昉

公昉昇仙雞犬皆去惟鼠惡其穢垢不將鼠自悔一
月三吐易其腸東廣微所謂唐鼠是也

朱仲

漢高后下書募三寸珠仲賞珠詣闕魯元公主從仲
求珠仲獻四寸珠景帝時、木獻三寸珠數十顆

劉安

淮南王安見太清仙伯以坐起不恭謫守天廁

劉京

京授九子九子王公公時已七十歲服之御八十妾
生二十兒

梅福

墨池在南昌縣水竹幽蔚王右軍典臨川郡日每過

此盤礴不能去因號墨池先是福種蓮花池中嘆曰
生爲我醜身爲我枯形爲我辱妻爲我毒遂棄妻人
洪崖山

樂巴

廬山廟有鬼物能使江湖中分風舉帆巴下檄勅鬼
踪跡鬼走齊郡化爲書生談五經太守妻以女巴勅
殺之空中刀下裡頭墮地太守女巴生一見俄化爲
狸亦殺之

孔元方

元方以杖拄地一手抱杖側豎頭在下足向上以一手持酒盃側飲之

李意期

人有說四方郡國官親市里期即撮士成之經見者詫其酷類但織小耳

張仲常

仲常埋甕室下對妻子鼻飲恣飽葷血及發甕已多度甕中經日不腐

王喬

喬萊蒙城東自成塚其夕縣中牛皆流汗喘乏或云
季橋山卽太子晉

趙威伯

威伯善嘯若衝風之激長林衆鳥羣鳴須臾雲翔其
上冥霧四合零雨其濛

劉偉道

偉道學仙仙人試以白髮一莖懸十萬斤巨石鼠嚼
髮垂垂欲絕使偉道臥其下了無怖色蓋二十年

王中倫

晉武帝太康中田宣隱于鳴石岩下葉風霜月掛石
自娛每見一人着白單衣徘徊岩上清曉方去自言
王仲倫生周宣王時愛此石磴清激故輒留聽

李阿

阿逢犇牛以足脛置車下爓其骨皆折阿死須臾復
生足亦如故

介象

象入東岳受禁制之術能令一市人皆坐不起有客
種黍山中患羣猴採食之乞辟猴法象告汝見猴羣

第語之吾已告介君介君教汝莫食明日客試以象
言語猴猴果連臂投林而去

張道陵

道陵居渠亭山見青童絳節前導曰老君至矣從者
二人貌似弱冠或指曰此子房此子淵

王暉

暉種黃精虎爲之耕豹爲之耘出入亦乘虎豹具鶴
轡行鞭策如乘馬

鮑靚

靚與爲稚川善每來門無車馬獨雙燕往還或怪而
網之則雙履也墟城集仙錄云靚以次妻稚川

姜伯貞

伯貞值史伯真命立日中背後靚之其心不正因教
之服石腦

元藏機

機有馴鳥三類黃鶴時翔空中呼之立至能授人語
常航海飄至一島島人曰此滄洲也產分蒂瓜長二
尺碧棗丹栗大如梨池中有四足魚金蓮花婦人採

爲首飾曰不戴金蓮花不得在仙家

陳簡

簡遇道者引至石室屬以地上素書一軸曰汝有書
性好爲我書發標視皆古篆籀文心難之度無可選
選遂按本半日書竟

葛玄

玄遇親朋輒邀止折草刺樹以杯盛之汁流如泉杯
滿卽止飲之皆旨酒取瓦礫草木之實勸客皆脯棗
指蝦蟇使飛龜使舞應節如人爲客行酒杯自至前

不盡杯不去

鄭思遠

思遠每出行乘虎二虎雖負經而從橫江橋逢許隱
具矮藥酒虎爲拾柴燃火隱患齒痛求虎鬚熟挿齒
間思遠拔之虎帖地不動

黃野人

野人遊羅浮長嘯數聲迤鬱林樾宋咸淳中客有戴
烏方帽着鞢往來羅浮山中見人則大笑反走三年
不言姓氏他日醉歸忽取煤書壁云雲意不知滄海

春光欲上翠微人問一墮千劫猶愛梅花未歸蓋野
人之倚歎

許翺

真人告翺曰學道當如穿井非彌深土彌難出

陶弘景

弘景右膝有數十黑子作七星文少便鞍馬善射晚
皆不爲惟聽吹笙借人書隨候治定

王遠知

遠知曇首之子毋夢靈鳳有身借寶誌曰生子當爲

神仙宗伯

司馬承禎

顧善金剪刀書牖中有小兒誦經聲玲玲如振玉額
上小日如錢耀射一席

李含光

含光工篆隸或稱過其父一聞之終身不復書

許遜

遜爲獨旃陽令既歸父老送之如雲有不返者乃于
宅東隙地結茭以居狀如管壘多改氏族以從許姓

號許家營

許大

大爲真君掃髮夫婦隱于西山不欲人識改姓曰午
旋改曰干夫婦皆解詩許大詩云不是藏名混世俗
賣柴沽酒貴忘言妻續云兒家祇在西山裡除却白
雲誰到門

胡惠超

起身不甚長然每處稠人中首獨昂出其上雖至長
者止及肩下拈地中古金石寶器穿之如言而獲

單道開

開脈細石子一吞數枚唐子西贊曰世人茹柔剛則吐之匙抄爛飯牛口如飼至人忘物剛柔一致其視食石如嚼餅餌北平飲羽出于無心食石之理于此可尋我雖不能而識其理庶幾漱之而礪厥齒

范豹

豹云東方朔乃黠我我小兒時數與之校魯宋文帝召見豹從東宮過指宮門曰此中有博勞鳥奈何養賊

寇謙之

成公興備于寇之從母家使墾田寇一日于林下布
筭周髀解法不合公興教之應手而成

嚴達

周武帝建德中詔達至使殿時已汰浮屠氏復欲漸
芟黃冠上問道與釋孰優對曰主優而客劣上曰主
客奚辨曰釋出西方得非客乎道出中夏得非主乎
上曰客既西歸主無送耶對曰客歸則有胡上主在
則無損中華去者不追居者自保又何送乎上大笑

得免

孫敬

微隱遜宿于木杪編寫爲席合日端坐其友馬儉思
之取葛席置靜室供養數日輒聞席上有人語

丁玄真

毒龍潭二龍飛入殿與張僧諫回龍闕風雨震沸玄
真画鐵符鎮潭龍穿山而去復釘画龍之目其患乃
止

顏真卿

白紫清云真卿今爲北極驅邪院左判官

伊祁玄解

西域進方圓二美玉玄解曰此龍虎玉也圓生于水龍寶之方生于山虎寶之詢使人果得之漁獵者

摸先生

先生束雙髻于頂携小竹筒賣藥有疾者手摸之輒愈人所爲摸先生

王元之

元之數歲時夜出門見一道士隨之人江在水底月

明中行不見泥沙水隨步自開路傍一物十丈許如
龍如蛇有五色光道士指曰此水母也見之長生自
是便能逆風掛帆泛水安坐

女俠傳

武進鄒之麟

豪俠

昔太公釣於渭水入十年矣人未有識之者卽以
又王之聖之亟於求賢且以夢以卜嗟乎士信于
知己而緇於不知己相知蓋若斯之難也傳稱五
百年必有王者興其間必有名世者天作之合若
或閉之於此有人焉睥睨其間與日月爭光此豈
非所謂賢豪間者耶鹿門水鏡庶幾近之方諸女

子蓋寥寥已

漂母

淮陰侯韓信始爲布衣時貧無行不得推擇爲吏又不能治生商賈常從人寄食飲人多厭之者常數從其下鄉南昌亭長寄食數月亭長妻患之乃晨炊糜食食時信往不爲具食信亦知其意怒竟絕去信釣於城下諸母漂有一母見信饑飯信竟漂數十日信喜謂漂母曰吾必有以重報母母怒曰大丈夫不能自食吾哀王孫而進食豈望報乎

張耳妻

張耳者大梁人也其少時及魏公子毋忌爲客張耳嘗亡命游外黃外黃富人女甚美嫁庸奴亡其夫去抵父客父客素知張耳乃謂女曰必欲求賢夫從張耳女聽乃卒爲請決嫁之張耳張耳是時脫身游女家厚奉給張耳張耳以故致千里客乃客魏爲外黃令名由此益賢

齊姜

晉公子重耳出奔至齊齊桓公妻之有馬二十乘公

子安之從者以爲不可將行謀於桑下靈妾在其上以告姜氏姜氏殺之而謂公子曰子有四方之志其聞之者吾殺之矣公子曰無之姜曰行也懷與安實敗名公子不可姜與子犯謀醉而遣之

倍負羈妻

晉公子重耳及曹倍負羈之妻以吾觀晉公子之從者皆足以相國若以相夫子必反其國反其國必得志於諸侯得志於諸侯而誅無禮曹其首也子盍蚤自貳焉乃饋盤餐實璧焉

潮女

子胥行至吳疾於中道乞食溧陽適遇女子擊綿於
溧水之上篚中有飯子胥遇之謂曰夫人可得一餐
乎女子曰妾獨與母居三十未嫁飯不可得子胥曰
夫人賑窮途少飯亦何嫌哉女子知非恒人遂許之
發其篋筮飯其盎漿長跪而與之子胥再餐而止女
子曰君子有遠誓之行何不飽而餐之子胥已餐而
去又謂女子曰掩夫人之壺漿無令其露女子歎曰
嗟乎妾獨與母居三十年自守貞明不願從適何宜

饋飯而與丈夫越於禮義妾不忍也子行矣子胥行
反顧女子已自沒於瀨水矣

文君

司馬相如初與卓文君還成都貧居愁懣以所著鶴
鷄裘就市人陽昌貰酒與文君爲權文君舉杯而笑
曰我平生富足今乃以裘貰酒遂相與謀於成都賣
酒相如親着犢鼻裈滌器以耻王孫王孫果以爲病
乃厚給文君文君遂爲富人文君效好眉色如望遠
山臉際常若芙蓉肌膚柔滑如脂十七而寡爲人放

誕風流故悅長卿之才而越禮焉長卿素有消渴疾
及遠成都悅文君之色遂以發痼疾乃作美人賦欲
以自刺而終不能改卒以此疾至死文君爲誄傳於
世

梁夫人

韓新王之夫人京口姑也嘗五更入府伺候賀朔忽
於廟柱下見一虎蹲卧鼻息訶訶然驚駭亟走出不
敢言已而人至者衆復往視之乃一卒也因蹴之起
問其姓名爲韓世忠心異之密告其母謂此卒定非

凡人乃邀至其家具酒食卜夜盡歡深相結納資以金帛納爲夫婦斬王後立殊功爲中興名將遂封兩國夫人斬王嘗邀兀朮於黃天蕩幾成擒矣一夕鑿河遁去夫人奏疏言世忠失機縱敵乞加罪責舉朝爲之動色

義俠

摩詰有言西風剝首向公子七十老翁何所求嗟
乎有所求者利也無所求者義也傳嘗曰求仁而
得仁札之劔良之椎高之髡鉗布之奏事越頭下
仁則吾不知也不旣信不倍言義者有焉其庶乎
太史公發憤論次古布衣之俠而之數者不少槩
見何哉魯連之不帝秦與夷齊叩馬事何異而一
則曰義人一則曰其意指不合大義豈君子喻義
子長非其人邪爲之次女俠義者

如姬

秦昭王圍邯鄲急平原君夫人爲信陵君姊遺書魏公子請救公子及賓客辯士說王萬端魏王畏秦終不聽公子公子自度終不能得之于王乃欲赴秦軍與趙俱死行過夷門別侯生侯生乃屏人語曰羸聞晉鄙之兵符常在王卧内而如姬最幸出入王卧内力能竊之羸聞如姬父爲人所殺如姬資之三年自王以下欲求報其父仇莫能得姬爲公子泣公子使客斬其仇頭敬進如姬如姬之欲爲公子死無所辭

顧未有路耳公子誠一開口請如姬如姬必許諾則得虎符奪晉鄙軍北救趙而西却秦此五霸之伐也公子從其計請如姬如姬果盜晉鄙兵符與公子

聶榮

聶政姊榮聞人有刺殺韓相者賊不得國不知姓名暴其尸而縣之千金乃於邑曰其是吾弟與嗟乎嚴仲子知吾弟立起如韓之市而死者果政也伏尸哭極哀曰是軹深井里所謂聶政者也市行者諸衆人皆曰此人暴虐吾國相王縣購其名千金夫人不聞

與何敢未識之也榮應之曰聞之然政所以蒙污辱
自棄於市販之間者爲老母幸無恙妾未嫁也親既
以天年下世妾以嫁夫嚴仲子乃察舉吾弟困污之
中而交之澤厚矣可柰何士固爲知己者死今乃以
妾尚在之故重自削以絕從妾其柰何畏殺身之誅
終滅賢弟之名大驚韓市人乃大呼夫者三卒於邑
悲哀而死政之旁

魯保母

孝義保者魯孝公刑之保母臧氏之寡也初孝公父

武公與其二子長子括中子戲朝周宣王宣王立戲
爲魯太子武王薨戲立是爲懿公孝公時號公子稱
最少義保與其子俱入宮養公子稱括之子伯御與
魯人作亂攻殺懿公而自立求公子稱將殺之義保
聞伯御將殺稱乃衣其子以稱之衣卧於稱之處伯
御殺之義保遂抱稱以出遇稱舅魯大夫於外舅問
稱死乎義保口不死在此舅曰何以得免義保曰以
吾子代之義保遂以逃十一年魯大夫皆知稱之在
保於是請周天子殺伯御立稱是爲孝公

魏乳母

魏乳母者魏公子之乳母秦攻魏破之殺魏王瑕誅諸公子而一公子不得令魏國曰得公子者賜金千鎰匿之者罪至夷乳母與公子俱逃魏之故臣見乳母而識之曰乳母無恙乎乳母曰嗟乎吾奈公子何故臣曰今公子安在吾聞秦令曰有能得公子者賜金千鎰匿之者罪至夷乳母倘言之則可以得千金知而不言則昆弟無類矣乳母曰吁我不知公子之處故臣曰我聞公子與乳母俱逃母曰吾雖知之亦

終不可以言故臣曰今魏國已破亡族已滅子匿之
尚誰爲乎母吁而言曰夫見利而反上者逆也畏死
而棄義者亂也今持逆亂而以求利吾不爲也且夫
凡爲人養子者務生之非爲殺之也豈可利賞畏誅
之故廢正義而行逆節哉妾不能生而今公子擒也
遂抱公子逃於深澤之中故臣以告秦軍秦軍追見
爭射之乳母以身爲公子蔽矢着身者數十與公子
俱死秦王義之葬以卿禮賜金百鎰祀太牢寵其兄
爲五大夫

罷娥說

酒泉烈女龐娥親者表氏龐子夏之妻祿福趙君安
之女也君安爲同郡李壽所殺娥親有弟三人皆欲
報讐壽深以爲備會遭災疫三人皆死壽聞之
會宗族共相慶賀云趙氏彊壯已盡唯有女弱何足
復憂防備懈弛娥親子游山行聞壽此言還以啟娥
親娥親旣素有報讐之心及聞壽言感激愈深愴然
隕涕曰李壽汝莫喜也終不活汝戴履天地爲吾門
戶吾三子之羞也焉知娥親不手刃殺汝而自徼倖

那陰市名刀挾長持短晝夜哀酸志在殺壽壽爲人
凶豪聞娥親之言更乘馬帶刀鄉人皆畏憚之比隣
有徐氏婦憂娥親不能制恐逆見中害每諫止之曰
李壽男子也凶惡有素加今備衛在身趙雖有猛烈
之志而強弱不敢邂逅不制則爲重受禍於壽絕滅
門戶痛辱不輕也願詳舉動爲門戶之計娥親曰父
母之讐不誣夫地不共日月者也李壽不死娥親視
息世間活氣何求今雖三弟早死門戶喪絕而娥親
猶在豈可假手於人哉若以卿心況我則李壽不可

待殺諸我之心則李壽必爲我所殺明矣夜數磨礪
所持刀訖振處切齒悲涕長歎家人及隣里咸共笑
之娥親謂左右曰卿等笑我直以我女弱不能殺壽
故也要當以壽頸而汚此刀刃令汝輩見之遂棄家
事乘鹿車伺壽至光和二一年二月上旬以白日清時
於都亭之前與壽相遇便下車扣馬叱之壽驚懼
馬欲走娥親奮刀斫之并傷其馬馬驚壽擠道邊溝
中娥親尋復就地斫之深中樹間折所持刀壽被創
未死娥親因取壽所佩刀殺壽壽護刀眼目大呼跳

梁而起娥親乃挺身奮手左抵其額右椿其喉反覆
盤旋應手而倒遂拔其刀以截壽頭持詣都亭歸罪
有司徐步詣獄辭顏不變時祿福長漢陽尹嘉不忍
論娥親卽解印綬去官弛法縱之娥親曰讐塞身死
妾之明分也治獄制刑君之常典也何敢貪生以枉
官法鄉人聞之傾城奔往觀者如堵焉莫不爲之悲
喜慷慨嗟歎也守尉不敢公縱陰語使去以便宜自
匿娥親抗眉大言曰枉法逃死非妾本心今讐人已
雪死則妾分乞得歸法以全國體雖復萬死於娥親

畢足不敢食生爲明廷負也尉固不聽所執娥親復
言曰匹婦雖微猶知憲制殺人之罪法所不縱今旣
犯之義無可逃乞就刑戮隕身朝市肅明王法娥親
之願也辭氣愈厲而無懼色尉知其難奪強載還家
涼州刺史周洪酒泉太守劉琚等並其表上稱其烈
義刊石立碑顯其門閭太常弘農張奐貴尚所履以
東帛二十端禮之海內聞之者莫不改容贊善高大
其義

節俠

聖人諱言節蓋至於節而天下之事解矣故寧取
管仲之仁而不與匹夫匹婦之諒誠重之也雖然
臣死君子死父婦死夫天性已固然者況閭巷之
所稱朝廷之所褒丹青之所風美備是矣猶尚寥
寥不易見豈中庸不可能也自丹固可蹈耶若夫
非君非父非夫而無褒稱風美之斐片語觸激嚙
臂相期雖生而有所不用卽以折諸聖賢之節吾
不知其何如然而移彼易此易易耳田光先生之

報太子丹曰爲行而使人疑之非節俠也嗟乎彼
何心哉感而序節俠

虞姬

虞氏西楚霸王項羽美人也羽被漢圍垓下夜聞漢
軍四面皆楚歌乃人驚曰漢皆已得楚乎是何楚人
之多也乃起飲帳中慷慨悲歌自爲詩曰力拔山兮
氣蓋世時不利兮驩不逝驩不逝兮可奈何虞兮虞
兮奈若何歌數闕美人和之曰漢兵已畧地四面楚
歌聲大王意氣盡賤妾何聊生泣數行下遂自刎

綠珠

綠珠者姓梁白州博白縣人也州則南昌郡古越地秦象郡漢合浦縣地唐武德初削平蕭銑於此置南州尋改爲白州取白江爲名州境有博白山博白江盤龍洞房山雙角山大龍山山上有池池中有婢妾魚綠珠生雙角山下美而絕越俗以珠爲上寶生女爲珠娘男爲珠兒綠珠之字由此而稱晉石崇爲交趾採訪使以異珠三斛致之崇有別廡在河南金谷澗澗中有金水自太白源流崇卽川阜製園館綠珠

能吹笛又善舞明君明君者昭君也漢元帝時匈奴
單于入朝詔王嬋配之卽昭君也及將去入辭光彩
射人天子悔焉重難改更漢人憐其遠嫁爲作此歌
崇以此曲敬之而自製新歌曰我本良家子將適單
于庭辭別未及終前驅已抗旂僕御涕流離後馬悲
且鳴哀鬱傷五內涕泣沾珠纓行行日已遠遂造匈
奴城延我於穹廬加我閼氏名殊類非所安雖貴非
所榮父子見凌辱對之慚且驚殺身良不易默默以
苟生苟生亦何賴積思常憤盈願假飛鳥翼棄之以

選征飛鴻不我顧佇立以屏營昔爲匣中玉今爲糞
上英朝華不足歡甘與秋草屏傳語後世人遠嫁難
爲情崇又製懊惱曲以贈綠珠崇之婢妾艷者千餘
人擇數十人粧飾一等使忽視之不相分別刻玉爲
蛟龍佩紫金爲鳳凰釵結袖繞櫺而舞欲有所召者
不呼姓名唯聽佩聲視釵色佩聲輕者居前釵色艷
者於後以爲行次而進趙王倫亂常賊類孫秀使人
求綠珠崇方登涼觀臨清水婦人侍側使者以告崇
出侍婢數百人以示之皆蘊蘭麝而披羅縠曰在所

擇使者曰君侯服御麗則麗矣然命指索綠珠未知孰是崇勃然曰吾所愛不可得也秀因譖倫族之收兵忽至崇謂綠珠曰我今爲爾獲罪綠珠泣曰願效死於君前崇止之遽墮樓而死崇棄東市時人名其樓曰綠珠樓在步廣里近狄泉在王城之東

段東美

薛宜僚會昌中爲左庶子充新羅冊贈使由青州泛海船頻阻惡風雨至登州却漂迴泊青州郵傳一年節使鄔漢貞尤加待遇有籍中飲妓段東美者薛願

屬情連帥置於驛中是春薛發日祖筵嗚咽流涕東
美亦然乃於席上留詩曰阿母桃花方似錦王孫草
色正如煙不須更向滄溟望惆悵歡情恰一年薛到
外國未行冊禮旌節曉夕有聲旋染疾謂判官苗甲
曰東美何故頗見夢中乎數日而卒苗攝大使行禮
薛旋視迴及青州東美乃請告至驛素服執奠哀號
撫棺一慟而卒

任俠

余觀漢高之脫季布與條侯得劇孟語任俠行權
幾奪天子矣專趨人之急甚已之私既已死生存
亡不可謂不賢者而韓子短之且與儒者同類而
共譏豈匹夫而託南面犯禁亂法自此始耶汲長
孺鄭當時古名臣也皆用俠聞豈不矜能不伐德
廉潔退讓有足稱歎乎讓天下者方能任天下
鄙人嚮利可與圖事乎哉

昭君

昭君字嬀南郡人也初元帝時以良家子選入掖庭
會匈奴單于來朝求美入爲閼氏帝勅以宮女賜之
昭君入宮數歲未得見御積悲怨乃請掖庭令求行
單于臨辭大會帝召女以示之昭君豐容靚飾光明
漢宮顧影徘徊竦動左右帝見人驚意欲留之而重
難改更遂與匈奴昭君戎服乘馬提一琵琶出塞而
去

木蘭

陳陝人也代父戍邊十二年人不知其爲女歸賦

戍邊詩一篇其詞云促織何唧唧木蘭當戶織不聞
機杼聲唯聞女歎息問女何所思問女何所憶昨夜
見君帖可汗大點兵軍書十二卷卷卷有耶名阿耶
無大兒木蘭無長兄願爲市駿馬從此替耶征東市
買駿馬西市買鞍轡南市買轡頭北市買馬鞭旦辭
耶孃去暮宿黃河邊不聞耶孃聲喚女但聞河水聲
澶澶旦辭黃河去暮宿黑山頭不聞耶孃喚女聲但
聞胡騎聲啾啾萬里赴戎機關山度若飛朔氣傳金
柝寒光照鐵衣將軍百戰死壯士十年歸歸來見天

子天子坐明堂策勳十二轉賞賜百千強可汗問所
欲木蘭不用尚書郎願托千里足送兒歸故鄉那娘
聞女來出郭扶相將阿妹聞姨來當戶理紅妝小弟
聞姊來磨刀霍霍向豬羊聞我東閣門坐我西間牀
脫我戰時袍着我舊時裳當憲理雲鬢挂鏡帖花黃
出門看火伴火伴皆驚忙同行十二年不知木蘭是
女郎雄兔脚僕走雌兔遠迷離雙兔傍地走安能辨
我是雄雌君子曰若木蘭者亦壯而廉矣使載之列
女傳緜縈曹娥將遜之蔡姬當低頭愧汗不敢比肩

杜牧題水蘭廟詩云彎弓征戰作男兒夢裡曾經學
畫眉幾度思歸還把酒拂雲堆上祝明妃

莒婦

莒有婦人莒子殺其夫已爲嫠婦及老托於紀鄆紡
焉以度而去之及師至則投諸外獻諸子占子占使
師夜縋而登登者六十人縋絕師鼓譟城上之人亦
譟莒公懼啟西門而出七月丙子齊師入紀

緹縈

漢齊太倉令淳于公之女名緹縈者淳于公無男有

女五人孝文皇帝時淳于公有罪當刑是時肉刑尚在詔繫長安當刑會違公罵其女曰生女不生男緩急非所益緹縈自悲泣而隨其父至長安上書曰妾父爲吏齊中皆稱治平今坐法當刑妾傷夫死者不可復生刑者不可復續雖欲改過自新其道無繇也妾願入身爲官婢以贖父罪使得自新書奏天子憐其意乃下詔曰蓋聞有虞之時畫衣冠異章服以爲戮而民不犯何其至治也今法有肉刑五而奸不止其咎安在非朕德薄而政之不明哉吾甚自愧夫訓

導不純而愚民陷焉詩云豈弟君子民之父母今人
有過教未施而刑加焉或欲改行爲善其道毋由朕
甚憐之夫刑者至斷支體刻肌膚終身不息何其痛
而不德也豈稱爲民父母之意哉其除肉刑自是之
後鑿顛者斃抽脇者笞刑足者鉗淳于公得免焉君
子謂縱祭得一言發聖主之意易曰小懲而大誡漢
文之謂也

游俠

太史公之傳游俠詳矣退四公子之徒而進朱家
劇孟有以也虞卿不重相印而從魏齊鄭莊行千
里不需糧游道頗廣翩翩儒而俠矣游俠關如何
也稍以意爲之論次

陶母

陶侃母湛氏豫章新淦人初侃父丹聘爲妾生侃而
陶氏貧賤湛每紡績資給之使交結勝已侃少爲潯
陽縣吏嘗監魚梁以一卅鮓遺母湛封鮓及普貴侃

女俠傳

八

十九

曰爾爲吏以官物遺我非惟不能益吾乃以增吾憂矣郡陽孝廉范達寓宿於侃時大雪湛乃撤所卧新薦自剉給其馬又密剪髮賣與隣人供穀饌達聞之歎息曰非此母不生此子侃竟以功名顯

澤姬

劉道真少時嘗漁草澤善歌嘯聞者莫不留連有一老姬識其非常人甚樂其歌嘯乃殺豚進之道真食豚盡了不謝姬見不飽又進一豚食半餘半乃還之後爲吏部郎姬兒爲小令史道真超用之不知所由

問母母告之

絡秀

周浚作安東時行獵值暴雨過汝南李氏富足而男子不在有女名絡秀聞外有貴人與一婢於內椎猪殺羊作數十人飲食事事精辦不聞有人聲窺覘之獨見一女子狀貌非常浚因求爲妾父兄不許絡秀曰門戶珍瘁何惜一女若連姻貴族將來或大益父兄從之生伯仁兄弟絡秀語伯仁等我所以屈節爲汝家作妾門戶計耳汝若不與吾家作親親者

吾亦不惜餘年伯仁等悉從命由此李氏在世得方
輜齒遇

獨孤氏

李昌夔在荊州打獵大修裝飾其妻獨孤氏亦出女
隊二千人皆着紅紫繡襖子及錦鞍轡

劍俠

魯勾踐之稱荆軻曰惜哉其不講於劍之術也夫
白日殺人都市人不之覺傳以刀圭立化呼吸千
里度城郭門堂屋壁無礙是遵何術與天下無道
則見有道則隱大抵伺諸鬼神之殺亂以竊借其
靈近於惟矣紅綠鼎隱根託再來法傳幽穴滌忽
眇眇始僊而鬼神其術者邪然能行之侯王將相
不能加無道之始皇賊殺魑魅不軌未聞毒諸端
人正士蓋取道小而行直方者也世有負心小醜

不足辱朝廷之斧鉞而天下甘心焉倘非以輕劍擊之惡能勝其任而媮快乎

紅線

俱見劍俠傳

聶隱娘

賈人妻

三鬟女子

車中女子

貧士傳上卷

吳郡黃姬水

披裘公

披裘公者吳人也。延陵季子出遊，見路有遺金，公當夏五月披羊裘負薪而過之。季子呼公取焉，公投鎌于地，瞑目拂手而言曰：「子何居之高而視之下，類之君子而言之野也。」吾五月披裘而負薪，豈取遺金者哉？季子知其爲賢者，請問姓字，公曰：「吾子皮相之士，何足語姓字也。」遂去。季子立而望之，不見，乃上。

札也行國公邁中達食薪力負冬裘夏披黃金可
拾素操豈移秘名勿示佇覽莫追

老萊子

老萊子者楚人也當世亂逃耕蒙山之陽墻以瓦葺
室以蓬蒿牀以枝木席以著艾水飲菽食墾山播種
蕭然世表也楚王駕先其門當萊子織舂而言曰守
國之政孤願煩先生萊子許之其妻曰妾聞酒肉我
者可鞭箠我官祿我者可鈇鉞我妾詎能爲人所制
哉遂投其舂而去萊子亦隨至于江南而止曰鳥獸

之毛可績而衣其遺粒足食也仲尼嘗蹙然改容于斯言

老萊鴻翼蒙中耕處草木遊遊水菽吸吸綠園陳謨朱方借底績毛食粒蹙容宣父

榮啟期

榮啟期者周時人也值衰世隱居窮處遺物未已時披裘帶索行吟於路曰吾著裘者何求帶索者何索嘗鼓琴而歌孔子過之問曰先生何樂曰吾樂有三天生萬物惟人爲貴而吾得爲人以男爲貴而吾得

爲男或皆不免于襁褓而吾行年九十矣是三樂也
夫貧者士之常也死者命之終也居常待終當何憂
乎孔子聆其語爲之三日悲焉

啟期至素拒外抱中以放舒詠因服表衷志楊舜
絃詞慨尼聰三樂弗設一丘同窮

春秋三子

春秋三子者楚之父子魯之周子齊之狂子也三子
生當衰世之季目覩王綱之斁思欲絕景雲表灑志
溟澤乃相與居泰山之陽處環堵之室草戶不扉蓋

茨不翦而高歌不輟君子謂可方之倪缺云

殊方三子同道一心蚶蜆姬那鳳遠泰岑作義舉
色舍和保真豈謂陋棲廢厥高吟

鮑焦

鮑焦者不知何許人也衣弊膚見挈舂持蔬遇子貢
於道子貢曰吾子何以至于此也焦曰天下之遺德
牧者衆矣吾何以不至于此也吾聞之世不巳知而
行之粹行也上不巳用而干之毀廉也粹行毀廉然
且弗舍或于利者也子貢曰吾聞之非其世者不生

其利汙其君者不履其土非其世而持其蔬詩曰普
天下之下莫非王土此誰有之哉焦曰嗚呼吾聞賢
者重進而輕退廉者易愧而輕死於是棄其蔬而立
槁于洛水之上

於烈鮑焦躄步周行耻辰叔季結想上皇日賜啟
言投疏立儻孤潔名流洛水並長

齊餓

齊餓者不知何姓字也齊大饑黔敖爲食於道以待
餓人有蒙袂撝屨貿貿然來者敖左奉食右執飲曰

嗟來食迺揚目而視之曰予惟不食嗟來之食以至
於斯也從而謝焉終不食而死曾子聞之曰其嗟也
可去其謝也可食

淄境薦凶敖也設食槁瘞有來虎餓孔棘呼嗟致
聲舉睞作色箝豆終揮舍飯甘沒

黔婁先生

黔婁先生者魯人也修身清節不求進於諸侯魯公
以鍾粟辟爲相齊王以黃金聘爲卿俱辭不就著書
四篇抱潔而死曾子與門人往弔之上堂見先生之

尸在牖下枕塹席藁緇袍不表覆以布被手足不盡
斂覆頭則足見覆足則頭見曾子曰斜引其被則斂
矣妻曰斜而有餘不如正而不足也先生以不斜之
故至于此生而不斜死而斜之非先生意也曾子不
能應遂哭之曰嗟乎先生之終也何以爲謚妻曰以
康乎曾子曰先生在時食不充口衣不蓋形死則手
足不斂勿無酒肉何樂于此而謚爲康邪妻曰否否
先生之生也甘天下之澹味安天下之卑位不戚戚
于貧賤不欣欣于富貴求仁得仁求義得義其斯可

謚爲康也已曾子喟然歎曰惟斯人也而有斯婦
有穆先生正以矩身禛辭兩國室之兼長缺歛曾
刪摛謚妻陳存雖苦節歿乃康名

北郭騷

北郭騷者齊人也結果罔捫蒲葦織屨履以養其母
猶不足踵門見晏子曰願乞所以養母晏子之僕謂
晏子曰此齊國之賢者也其義不臣乎天子不友乎
諸侯於利不苟取于害不苟免今乞所以養母是說
夫子之義也必與之晏子使人分倉粟府金遺之辭

金而受粟有間晏子見疑于君出奔北郭子曰吾聞之養及其親者身仇其難於是以身死白之

騷尚燕盤鉢陳晉寵母簋莫充相門斯踵銜惠何深酬身忻桶取不賊廉死非傷勇

仲尼三弟子

仲尼三弟子者顏回曾參原憲也回嘗簞食瓢飲處於陋巷人不堪其憂回也不改其樂孔子賢之它日嘗列弟子之行又曰回也其庶乎曼空及回死無以葬厥父顏路請夫子之車以爲柩云參不仕居衛繼

袍無表顏色腫膾手足腊胝三日不舉火十年不製
衣正冠而纓絕捉衿而肘見納履而踵決曳絛而歌
天子不得臣諸侯不得友而卒傳孔子之道憲居以
環堵茨以生草蓬戶不完桑木爲樞而甕牖二室稱
以爲寒上漏下濕匡坐而絃歌子貢盛服軒車往見
原憲憲韋冠緇履杖藜應門子貢曰先生病矣憲應
之曰憲聞無財之謂貧學道不能之謂病若憲貧也
非病也子貢逡巡而退有愧色

素王樂天水飲蔬飯道鑄三賢器同一範乃回幾

化乃參聞貫彼不受命曷知貧憲

河上貧者

河上貧者宋人也家貧緯蕭而食其子没于淵得千金之珠貧者謂其子曰取石來鍛之夫千金之珠必在九重之淵而驪龍領下子能得珠者必遭其睡也使驪龍而寤子尚奚微之有哉君子謂其不以貧而苟得焉

宋有玄人希微澹寂溯澗幽盤織葭聊食厥嗣淵投月珠乃獲量龍作戒碎糜宅石

子桑子

子桑子者不知何許人也子與與之友霖雨十日子
與恐其病也裹飯而往食之至子桑之門則若歌若
哭鼓琴曰父耶母耶天乎人乎有不任其聲而趨舉
其詩焉子與人曰子之歌詩何故若是曰吾思夫使
我至此極者而弗得也父母豈欲我貧哉天地豈私
貧我哉求其爲之者而弗得也然而至此極者命也
夫

桑也居困與實良朋浹旬病雨一飯造門歌絃崩

奏思故方深究之莫得歸彼生辰

列禦寇

列禦寇者鄭人也穆公時子陽爲相專任刑法禦寇乃絕迹窮巷面有饑色或告子陽曰列禦寇有道之士居君之國而窮君無乃不好士乎子陽與粟數十乘禦寇見使辭之其妻望之而拊心曰妾聞爲有道者皆得佚樂今有饑色君過而遺先生食不受非命也哉禦寇咲曰君非自我知也以人之言而遺我粟至其罪我也又且以人之言居一年子陽與其黨皆

見殺列禦冠獨全著書八篇曰列子

鄭圃列子壺丘是依刑名山濤清謚女饒彼以人
饋我以身辭永言窮巷世仰冲虛

莊周

莊周者宋之蒙人也家貧往貸粟于監河侯監河侯
曰諾我將得邑金將貸子以三百金可乎莊周忿然
作色曰周昨來有中道而呼者周顧視車轍中有鮒
魚焉周問之曰鮒魚來子何為者耶對曰我東海之
波臣也君豈有斗升之水活我哉周曰諾我且南遊

卷之八
八
吳越之王激西江之水而迎子可乎鮒魚忿然作色
曰吾失我常與我無所處吾得升斗之水然活耳君
乃言此曾不如早索我于枯魚之肆著書內外篇不
在而終

莊生知樂漆園曠逸郊畿不爲塗龜自厄假粟監
河誇金三百達言翠臂秋有倫春

鵬冠子

鵬冠子者楚人也隱居幽山衣敝屨空以鴟爲冠莫
測其名因服成號著書言道家用焉諶常師事之

後顯于趙鵬冠子懼其薦已也乃與諉絕終身不仕
荆有哲靈幽巖芳躅服不周形冠因作號赤縣隱
名丹書聞道有朋師顯斥交終操

顏觸

顏觸者齊人也居齊下邑宣王致見與語以爲君子
也願請受爲弟子觸曰玉生於山制則破焉非弗寶
貴矣然而太璞不完士生乎鄙野推選則祿焉非不
尊遂也然而形神不全觸雖貧晚食以當肉緩步以
當車無罪以當貴清淨貞正以自娛悅而已因再拜

辭去君子曰厲知足矣終身不辱

厲居側邑明擢齊宣侯師雖顯山玉弗完至道一
陳鄙邑言選貞璞無願君子誦焉

陳仲

陳仲字子終齊人也其兄戴爲齊卿食祿萬鍾仲以
爲不義嘗殺饋鷺與食出而哇之將妻子適楚居於
陵自謂於陵仲子窮不苟求食不非義遭歲饑乏糧
三日乃匍匐而取井上李食之蟲者三咽而能視聽
身織屨妻辟織以易衣食楚王遣使持金欲聘爲相

其妻曰亂世多害恐先生不保也遂相與逃去爲人

灌園

子終蚓操於陵自竄鷲哇兒饋李充蟬半乃屨乃
纊乃衣乃爨楚患內規高潛園灌

王高

王高者秦時人也當秦末饑亂父母兄弟死者十有
五人家貧徒壁立夫婦晝則傭耕夜則伐草燒博饑
食藜藿寒衣草衣而夫婦安然不變所守焉

高生不辰會秦鹿失竊然匹婦罄爾四壁晝禱夕

薪草衣藿食素患與貧而無戚戚

宋勝之

宋勝之南陽安衆人也少孤居穀城聚中孝慕甚篤
聚中化之少長有禮家貧不能自贍乃依食姊家數
歲往受易長安以信義稱從兄哀爲東平內史遣使
招之勝之曰衆人所樂者非勝之願也乃去太原從
郇越牧羊以琴書自娛丞相孔光就太原辟之不至
勝之德亭至孝作人姊食從寄兄爵蔑輕樂遊郇
園耻就孔勳絃榮綜玩展也鴻生

張仲蔚

張仲蔚者平陵人也閉門養性不治榮名與同郡魏景卿俱修道德隱身不仕明天官博物善屬文好詩賦常居窮素所處蓬蒿没人時人莫識唯劉龔知之仲蔚削智繕世自陶玄珠則保浮名弗襲采椽唯何惟蓬與蒿獨彼劉龔雅素締交

向長

向長字子平河內人性質相好通老易貧無資食好事者更饋焉受之取足而返其餘潛隱于家讀易

至損益卦喟然歎曰吾已知富不如貧貴不如賤但未知死何如生耳建武中與同好北海禽慶俱遊五嶽名山不知所終

向子委願榛莽屏居食淡每置爨甯返餘潛玩微象暢辨玄知緣海携友名嶽借歸

孫期

孫期字仲威濟陰武城人也晉京氏易古文尚書家貧不仕事母至孝饔膳莫供乃于大澤中牧豕以資奉養遠人從學者皆執經籠昨黃巾賊起適期里陌

轍相勅約曰莫犯孫先生舍司徒黃琬特辟之不行
終於家

期也居約職其爲子乃從先澤牧厥鄉豕青吟孝
質芳馨詔語德懷蠶寇名徵天府

閔貢

閔貢字仲叔太原人也世稱節士雖以周黨之潔清
自以弗及也黨見仲叔食無菜遺之生蒜仲叔曰吾
欲省煩耳今更作煩耶受而弗食建武中司徒侯霸
既辟至投劾而去復以博士徵不至客居安邑老病

家貧不能得肉日買猪肝一片屠者或不肯與令聞
勅吏常給焉仲叔怪問知之乃歎曰閔仲叔豈以口
腹累安邑耶遂去客沛以壽終

清矣仲叔廉節與推友饋弗嘗公聘再辭幡願在
旅鮮食莫需潔躬從沛卒老于斯

梁鴻

梁鴻字伯鸞扶風平陵人也鴻幼遭亂父卒卷席而
葬受業太學家貧厲節學畢牧豕於上林苑中誤遺
火延及宅舍悉以豕償其主猶以爲少鴻無宅財以

身居作後聘同縣孟光入門不答乃更椎髻布衣搽
作而前乃喜曰此真梁鴻妻也有頃共入霸陵山中
以耕織爲業復至吳居伯舉伯通廡下爲人負舂每
孟光與食舉案齊眉伯通知非凡人乃舍之于家鴻
潛閉著書旣卒伯通等爲葬于要離冢傍

伯鸞清白幼遭屯極惟舉作合彼美令德力耕隱
山爲春吳國良彥階心烈士並賦

張楷

張楷字公超不知何郡人也治嚴氏春秋古文尙書

就學車馬填門貴戚之家皆起舍巷以候過客之利
楷疾其如此輒徙避之家貧無以爲業常乘驢車至
縣賣藥足給食輒還鄉里

公超克學融博古今嘗從旣廣鳴徙何深花邑時
駕玉壺冰春優游郊里忘厥處貧

孔嵩

孔嵩字仲山南陽人也家貧親老乃變姓名傭爲新
野里卒友人范式行部到新野而縣選嵩爲導騎迎
式式見而識之呼嵩把臂曰子非孔仲山耶對之歎

息語及平生曰共語俱曳長裾遊集帝學吾蒙國恩
致位牧伯而子懷道隱身處于卒伍不亦惜乎嵩曰
昔候羸長守於賤業晨門肆志子抱關子居九夷不
患其陋貧者士之宜豈爲鄙哉式勅縣令代嵩嵩以
爲先饋未竟不肯去

嗟爾仲山淪賤攻苦才成國器珉編邑伍騶侯新
郊節逢故與握手論交報言援古

吳祐

吳祐者不知何地人也年二十喪父居無擔石而不

受贖遺常牧豕於長垣澤中行吟經書遇父故人謂
之曰卿二千石子而自業賤事縱子無耻奈先君何
祗辭謝而已守志如初

祐方弱冠卽抱莪悲慨却將贈牧諷典書父交相
遊忝生載規人各有心厥志莫移

婁壽

婁壽字元考南陽隆人也孩童岐嶷有志挽髮傳業
好學不厭榮汨溺之耦耕甘山林之杳藹遊夷衡門
樂以忘憂郡縣禮請終不回顧簾絺大布之衣糲糶

蔬菜之食蓬戶茅宇椽樞瓮牖樂天知命確乎其不可拔也是以守道識貞之士高尚其事年七十八卒國人相與論德處謚曰玄儒先生

元考純叟性澄不誘敦志星帷滅景雲藪在歎克歷于天宜考玄儒國謚懿述弗

郭太

郭太字林宗太原人也少事父母以孝聞家貧郡縣欲以爲吏歎曰丈夫何能執鞭斗筲哉乃欲遊學無資就姊夫貸錢五千與聞縣宗仲至京師從屈伯彥

學春秋并日而食衣不蔽形常以蓋幅自障出入入則蔽前出則掩後以母喪歸凡司徒辟大常趙典舉有道皆不就以建寧二年卒

懿哉林宗胥吏豈羈遐追聖學言邁王畿蟻習典學麟獲授書奔衰歸處藏器棲遲

符融

符融字偉明陳留浚儀人也州郡禮請孝廉連辟皆不應會黨事妻以貧無殯殮賴川張元祖來存融推所乘羸車牛馬欲爲具棺服融不肯受曰古之亾者

稟之中野唯妻子可以行志但卽土埋葬而已與同郡郭林宗田盛並不仕以終云

偉明逸韻抗道虬盤婦亾無歛友欲備棺乃行古志青野埋捐同襟借逝用晦林泉

申屠蕃

申屠蕃字子龍陳留外黃人也家貧備爲漆工郭林宗見而奇之少有名節鄉人稱焉父母卒哀毀思慕遂隱居學治京氏易嚴氏春秋小戴禮因博貫五經兼明圖緯前後凡蒲車特徵皆不就年七十四以壽

終

恬曠子龍被褐虛空冲心玄境汗跡傭工瞻依早
失經緯咸通蒲縑數返考命以終

徐氏父子

徐稱字孺子豫章南昌人也讀書豐城楮山之厓家
貧常自耕稼非其力不食恭儉義讓所居服其德常
齋磨鏡具到所住傭以自給桓帝以玄纁備禮徵聘
陳蕃胡廣黃瓊交辟不就靈帝欲以蒲輪聘罪會卒
時年七十二子胤字季登隱居不仕躬行稼儲倦則

誦經貧窶困乏執志彌篤不受惠于人太守華歆禮
請相見辭疾不詣建安中卒

孺子者何挺生杰出田耕

鑑磨行給臣命檄

求帝兩旌辟子胤丕承

德

貧士傳卷下

扈累

扈累字伯重京兆人也遭亂播遷徙鄴喪婦乃詣洛陽遂不復娶獨居道側以甃甃爲障施一厨床食宿其中晝日潛思夜則仰視星宿吟詠不綴衣纒敝服嘉平中縣令閔其孤老給廩不足就工作禪繕糧出後以疾亡

伯重曷師青牛尸堂遠播京洛予止塗傍潛道觀
文理素詠細須捷縣服庸保索糧

寒貧

寒貧者姓石字德林安定人也建安初客三輔乃就學長安宿儒樂文博氏通詩書於衆輩中最爲玄靜開中涓亂南入漢中不治產業不畜妻孥晝夜誦誅道書後還長安獨居窮巷冬夏敝衣連結里人與之衣食不取郡縣以其跡寡給焉時乞于市亦不多取人間姓名不荅故因號之曰寒貧也車騎將軍郭淮以意氣呼之問所欲登而不言因與脯糒及衣取其脯一胞糒一升而已

德林玄默範彼樂儒塵業弗務道典日披寒負致
號芳字莫知戎臣問道取食却衣

孫登

孫登字公和汲郡共人也無家屬居郡北山窟土爲
室夏則編草爲裳冬則披髮自覆好讀易撫琴性無
恚怒見者皆親樂之時游邑都所經家或設衣食者
一無所受嘗住宜陽山中文帝使阮籍往觀與語不
應嵇康從游三年問其所圖終不荅康每歎息將別
以才多識寡戒之後不知所終

公和弗偶宜陽居穴炎曦藪草寒暑被髮文係虞
絃載鼓載闕阮叩絨言菑遊戒別

董京

董京字威輦不知何郡人也初與隴西計吏俱至洛
陽常宿白社中或乞于市被髮而行逍遙吟咏得殘
碎繪絮結以自覆全帛全綿葉而不受著作郎孫楚
就社中與語載與俱歸復貽書之往京詩以辭之後
數年遁去莫知所之於其寢處唯有一石竹子及詩

二篇而已

威葦飄踪洛陽客至潔酒幽社汗游鄆市達矣行
吟鄙哉言仕倏焉遐舉獨遺玄賦

夏統

夏統字仲御會稽永興人也幼孤貧養親以孝友聞
每採稻求食星行夜歸或至海邊拘蠅蠅以資養雅
善談論宗族勸之仕統勃然作色曰使統屬太平當
與元愷評議遇濁代念與屈生齊潔若汗隆之間自
當耦耕沮溺豈有辱身屈意于郡府之間乎聞君之
談不覺毛灑汗匝顏赤心熱口張耳塞也言者大慙

統幼孤匱孝睦則聞采林星往拘水海征顯榮族
勵沮溺自任欽形遁世畢影高襟

郭文

郭文字文舉河內軹人也少愛山水尚嘉遯服畢不
娶步擔入吳興大辟山窮谷倚木于樹苦覆而居恒
著鹿裘葛巾不如酒肉區種菽麥采竹實鹽以供餘
杭令顯颺與葛洪共造之携輿俱歸颺贈韋袴褶一
具文不納辭歸颺追遣使者置衣而去後衣爛戶內
竟不服用王導聞其名遣船導迎之文荷擔而至居

導西園溫嘗問曰今將用先生以濟時若何文曰山
草之人安能佐世後逃歸臨安既卒葛洪庾闡並爲
作傳贊頌其美云

郭文嘉尚山水遐思名鳥旣歷荒谷攸居颺服弗
御導園覽柝一朝捐瑟二拆楊嶽

郭翻

郭翻字長翔武昌人也翻少有志操辭州郡辟家于
臨川以漁釣射獵不涉世交居貧無業欲墾荒田先
立表題經年無主然後乃作至稻將熟有伊認者悉

推與之縣令聞而給之以稻還翻翻竟不受其漁獵
所得或從買者不取其直亦不告姓名嘗墜刀于水
路人有爲取者因遂與之路人固辭翻曰爾所不取
我豈能得復沈刀于水其廉不受惠皆類此也

武昌翻里臨川寄室乃耕汗菜禾成弗獲乃鬻漁
獵售人無直沈器漣漪允符清德

沈道虔

沈道虔吳興武康人也少好老易居縣北石山下與
諸孤子弟共釜庾以拮拾自資同拮者爭穉道虔悉

以所得與之爭者媿而後每事輒云勿令居士知冬
無複衣戴頤聞而迎之周以錢服及還悉供諸衆無
衣者鄉里少年相率受學道虔無食以立學徒武康
令孔伋之相與餽給受業者始得有成道虔年老菜
食恒無經日之儲而琴書爲樂以終

道虔玄澹老易妍文饑仰撥稊寒鮮複衿戴周瞻
族孔給淑人老年藿食琴典欣欣

孔淳之

孔淳之字彥深魯人也孔子二十六代孫性好墳集

山水爲太原王公所稱居會稽剡縣茅室蓬戶庭草
蕪徑牀上有書數帙而已與處士戴顓王弘之王敬
弘等並爲人外之交又申之婚姻敬弘以女適淳之
子尚遂以烏羊繫所乘車轅提壺爲禮至則盡歡共
飲訖暮而歸或恠其若此荅曰因農夫田父之禮也
會稽太守鄭芳明要之不至使謂曰苟不人我郡何
爲入我郭淳之笑曰潛游者不識其水巢栖者非辨
其林飛沈所至何問其主終不屑往元嘉初復徵爲
散騎侍郎乃逃去家人莫知所在後東歸七年卒

淳之屬懷紫丘山水徑草芄芄牀書楚楚三星締
姻一壺成禮郡招耻屈帝徵逃徙

翟法賜

翟法賜者潯陽柴桑人也曾祖湯莊父矯並高尚
不仕法賜結屋廬山以獸皮結草爲衣雖鄉親中表
莫得見焉徵辟不就後家人至石室尋求因復遠徙
後卒于巖石之間

翟世清高法賜尤皎栖秀餐靈服毛御草迺避敷
求復投杳渺達人就蛻青巖陳殍

劉凝之

劉凝之字隱安南郡枝江人也慕老萊嚴子陵爲人
推家財與弟及兄子作舍野外非其力不食妻亦不
慕榮華樂甘儉苦共乘薄笨車入市賣易周用臨川
王義慶衡陽王義季遣使存問凝之荅書稱僕人或
譏焉凝之曰昔老萊向楚王稱僕嚴陵亦抗禮光武
未聞巢許稱臣堯舜也荊州年饑義季慮其餒斃餉
錢十萬凝之將錢至市門觀有饑色者悉分與之俄
頃立盡自甘饑餓後携妻子入衡山不返元嘉二十

五年卒

白尚凝之古逸自期于宗謝業于野爰居指媛同
德賢王抗儀衡陽終隱遂厥遁思

朱百年

朱百年會稽山陰人也家貧少有高志談玄屬詠携
妻人會稽山業採以樵箸置道頭輒爲行人所取明
旦復然人稍恠之積久知是朱處士所賣須者隨多
寡畱錢取樵箸而去或遇寒雪不售資匱自榜船送
妻還孔氏天晴復迎之追念母氏亡于冬月衣無綿

案自此不御嘗寒時就孔頭宿衣被單袂顛以臥具覆之既覺引臥具去體謂顛曰綿定奇溫卽洒涕悲慟顏峻爲東陽州餉穀三百斛不受百年卒蔡典宗爲會稽太守贈米以給孔氏遣婢詣郡門固讓時人美之以比梁鴻妻云

百年玄溱樵山自給一日弗售象旬無食孝不御溫廉能却物淑妻辭饋並彰清德

顧歡

顧歡字景怡吳郡鹽官人也家世寒賤父祖並爲農

夫歡獨好學年六七歲知推六甲父使田中驅雀歡
作黃雀賦而歸雀食稍過半父怒欲撻之見賦乃止
鄉中有學舍歡貧無以受業於壁舍後聽無遺亡者
夕則然糠自照及長篤志不倦居剡中天台山每日
出戶山鳥集其掌上取食年六十四卒

歎也農流性資秀悟年方岐嶷推甲作賦屬垣畫
業然糠宵度機心永絕山禽掌哺

吳蔡二隱

吳苞字懷德濮陽潁城人也學善三禮老莊過江教

授葛巾竹塵蔬食二十餘年與劉瓛俱與褚淵宅講授論語隆昌元年徵太學博士不就蔡會字休明陳西人也嘗慕苞清抗圭齋自守不與俗交李撝謂江斃曰古人稱安貧清白曰夷涅而不淄曰白如蔡休明者可不謂之夷白乎

懷德鉅儒北學南師屣揮宋組鑰開魯書依明景式高抗亦特古稱夷白撝頌不虛

徐伯珍

徐伯珍字文楚東陽太末人也少而孤貧學書無紙

常以竹箭箬葉甘蕉及地上學書及長讀詠不倦妻
亡不娶自比于曾參宅南九里有九巖山遂移居之
家極貧妻而兄弟四人皆白首相對時人呼爲四皓
前後徵辟凡十次皆不就

伯徵幼艱抱影長嘯藝翰摹精古墳深奧九巖逸
栖四人齊老自擬曾參世稱商皓

沈麟士

沈麟士字雲禎吳興武康人也敏慧博學有高尚之
心居貧織簾誦書口手不息鄉人號爲織簾先生又

傳人伐竹以繼餽靡嘗苦無書因游都下歷觀四部
乃歎曰古人亦何人哉稱疾歸鄉無所營求負薪
汲水并日而食守摻終老徵薦不_出者易禮老莊等
要畧數十卷于家

麟士俊敏尚志窮居誦口而畜業手以需討典都
游終履鄉歸昭昭經述來嗣足垂

沈顛

沈顛字處默幼清淨有志行慕黃叔度徐孺子之爲
人家貧惟讀書著述獨處一室人罕見其面從叔勃

貴顯還吳賓客填門顛獨不往勃就之顛迎送不踰
閭勃歎曰吾今乃知貴不如賤也齊末兵荒與家人
同甘困餓二日一餐或饋糧肉閉門不受惟采蓴苻
根供食以樵采自資怡然不改其樂

處默高步憲稭欽風守我冲寂傲彼尊榮踐戎並
遘饑膳皆空山植溪毛日搴以供

阮孝緒

阮孝緒字士宗陳留尉士人也孝緒七歲出繼從伯
胤之胤之母周氏卒遺財百萬應歸孝緒孝緒一無

所納盡以歸胤姊瑯琊王晏之母之間者嘆異性至
孝既冠荅父彥之誠曰願跡赤松于瀛海追許由於
窮谷庶保餘生以免塵累自是屏居一室非定省未
嘗出戶家貧無費僮僕竊隣人墓樵繼火孝緒知之
乃不食更令折屋而炊所居惟竹一叢而已

卓哉士宗年芳行偉百萬推金一塵甘餒瀛海清
涼穎陽高軌叢竹安愉沒窮無悔

劉訐

劉訐字彥度平原人也幼貧性不欲仕時有辟之者

訂卽挂檄于樹而逃事息乃還亦不願娶與陳雷阮
孝緒及族兄歆日夕招携都下謂之三隱卜築東澗
有終焉之志每遭窘迫併日而食隆冬或無袍絮處
之晏然人不覺其仁寒也常著穀皮巾披衲衣每遊
山澤輒畱忘返神理閑正姿貍甚華在林谷之間意
氣彌遠天監七年卒謚曰玄貞處士

訂當韶紀孤困卽遭觀賓弗利比友相招東澗盤
止遠岫遊遨玄貞清謚千載猶昭

胡叟

胡叟者不知何許人也居家高室草廛唯酒自適嘗謂人口我此生活似勝焦光不治產業飢貧不以爲耻養子字螟蛉以自給每至貴勝之門恒乘一牻牛布囊容三四升飲噉醉飽便盛餘肉併以付螟蛉兒車馬容華視之蔑如也

叟不家治寔勝焦光碧草寄趾黃流適情仰供養子時乞華門視彼榮富太虛馳雲

范元琰

范元琰字伯珪吳郡錢塘人也少通經史兼精佛義

居家不出城市雖獨居如對賓客見者莫不改容憚
之家徒四壁唯以園蔬爲業縣令上言義行楊州刺
史臨川王宏辟命不至卒于家

吳有元琰敏求慧性旣涉九經復昭三乘寂矣厭
紛儼乎居敬藝疏足老終違辟命

朱桃椎

朱桃椎益州成都人也澹泊絕俗披裘曳索人莫能
測長史竇軌見之遺以衣服鹿幘麕鞞逼署鄉正委
置不服更結廬山中夏則羸冬則緝木皮葉以自蔽

贈遺一無所受嘗織十芒屨置道上見者曰居士屨也爲鬻米茗易之置其所輒取去終不與人接高士廉爲長史備禮以請降階與之語不吝惟睨視而去士廉拜曰祭酒其使我以無事治蜀耶屢存問輒走林草自匿云

桃椎恬閑裘褐陶熙裕襟弗諒世網苦靡構雲取壯緯草由願友治請言默示無爲

孟浩然

孟浩然襄陽人也骨貌淑清風神散朗灌蔬藝竹以

全高尚然遊不爲利期以放性故常貧名不挂于選
部聚不盈于擔石雖屢空不給而自若也郡守韓朝
宗借浩然人秦先揚于朝約日引謁及期會友文酒
講好甚適或曰子與韓公預諾而忘之可乎浩然叱
曰僕已飲矣身行樂耳邊恤其它遂畢席不赴由是
聞罷終于冷城南園

楚獄隳靈孟拈挺生林嘉遜尚文妙匠心放適情
志任適天真臨觴負諾樂豈易名

高釋

高繹者長安人也有古人絕行處層中召至京師上欲命官固辭歸山賜號曰安素處士家甚貧寡妻子寒餒終不以困固受鄉人饋遺閉門讀書而已

高子勵行卓犖邁古德聞帝擢號錫山處室用雖艱鄉周弗取唯勤遜志披文暢喜

杜生

杜生者莫知其名時人呼爲杜五郎潁昌人也所居去邑三十里有屋兩間與子並居前有空地丈餘卽爲籬門生不出門者三十年黎陽尉孫軫往訪之自

陳村人無能公何見顧軫問所以爲生對曰昔有畝田與兄同耕迨兄子娶婦度不足贍乃盡以與兄而携妻子至此僦屋居之與人擇吉醫藥聊以供飢粥有時不繼云

杜生野寄逾紀潛門讓政敦睦俗室裕貧嚴卜韓方以粒以薪孫尉惠綬聆厥條陳

俞澹

俞澹字清老金華人也貧而無室栖山以居人呼之曰半山道人荆公王介甫嘉其潔尚乃彊爲釋牛山

以資澹日無錢得祠部耳公爲買之牒名紫琳已戒
期祝髮愆而不至公訝詰之澹曰吾思僧不易爲生
龜脫筒亦難堪恐祠部已付酒家償負耳

清老放達風神塵表麗偶弗借芳林孤蹈名公致
嘉迦業強造曠性不堪從厥所好

賈收

賈收字耘老烏程人也以詩著名喜飲酒家素貧東
坡先生每念之嘗作古木惟石書其後以贈云念賈
處士貧甚無以慰其意爲作古木惟石一紙每遇飢

時輒一開看還飽人否若吳典有好事能爲君月致
米三石酒三斗終君之世者當便以贈之不爾可令
侍姬掌貯須添丁長以付之也

買生茂士握槩吐珠綠醅則嗜白衣罕携室當交
請友實致思嘉圖雖慰玩豈忘饑

丁時習

丁時習字行可邵武人也父廷彥爲太學錄以忤蔡
攸歸卒時習遂棄青紫業儼舍掩籬玩讀經史晏如
也鄉朝貴有以書薦于有司終不往謁妻危氏同甘

苦未嘗以貧窮見辭色子百之千之夙興供洒掃具
蔬食畢卽受業恭謹終日杜來爲之立傳

廷彥邦直克陶哲器因止青蠅罔藏白責令妻刑
德異子繩義藝士昭陽播芳百嗣

蘇雲卿

蘇雲卿者豫章南昌人也初與丞相張德遠爲友宋
旣渡南德遠貴顯雲卿乃遁跡結庵于東湖之小洲
家貧畚礫爲圃織屨以自給垂三十年後德遠復相
函金帛移書帥府云有故人蘇雲卿在治下斯人管

樂流亞非折簡可招必禮致之帥漕乃以計造見翼
日遣吏迎候書幣不啓而雲卿已避矣

雲卿國彥乃丁世亂故交顯達湖洲遲玩管樂致
析幣書藜薦松間一語明發遐窺

蘇扶

蘇扶者隱士蘇庠仲子也工詩善書貧甚而有介郡
守辟之語子姪輩曰吾何以獲知時人特以先世隱
名存耳殆不過哀吾貧而周之寧忍以父名賣錢耶
固辭不往死至無以斂葬云

庠叟用晦逸範夙傳乃生麟角亦尚龍潛歌彰清
蘊書適熙天抱窮以歿題讌弗全

何溥

何傳字商霖永嘉人也潤澤詳整屬詩知名釜爨常
空而意趣悠然漠不爲累也葉水心常稱其凍餓自
守之樂死之日殯具無貲其友翁忱率素往來者葬
之

溥也括儒聖步賢趨玉堪擬德實偶彰儀躬遭育
鞠心嗜道腴獻稱有試友殯無歸

周方叔

周方叔字矩道居丹徒築室五州山下讀誦不休家
貧或終日不得食鄰僧乞米送之一日糞農鄉準孫
常州吳會造其廬無以爲具乃烹犬食之二公忻然
盡歡歎息而去

矩道崇廬考墳自娛如何樗施了繼儒靡朝軒有
造山釜無儲羹獻作饌式宴樂胥

呂徽之

呂徽之天台人也居芳山中綜博述詠安貧逸名常

漁以自給一日携弊楮詣富家易穀露頂短褐布襪
草履值大雪立門下人弗之顧徐至庭前聞閣中語
貴遊子弟詠雪苦吟弗就微之哂焉迺出侮之微之
口占以荅無不精美問其姓字終不言諸子弟曰嘗
聞吾鄉有呂處士者欲一見而不能先生豈其人耶
曰吾農家安知呂處士因惠之穀微之怒曰不義之
貨我何庸取遂去諸子弟嫩識其所雪霽覓訪唯草
屋壁立忽米舖內有人乃微之妻也以天寒無衣坐
爲障耳因問先生何在荅曰溪上捕漁乃至彼見之

徽之隔溪謂曰少需之得魚易酒飲諸公也俄頃携
魚酒至盡歡散別異旦復跡其蹤則徽之已行矣
作者徽之絕塵不羈蓋來山樛網罟捕魚遁跡一
出僻傭人知諸少甫扣孤雲復移

胡汲仲

胡汲仲字長孺天台人也特立獨行凍餓有守趙子
昂嘗爲羅司徒奉鈔百錠請作墓銘長孺怒曰我豈
爲宦官墓譽耶是日長孺絕糧其子以情白坐諸客
咸勸之受長孺愈堅嘗送蔡如遇歸東陽云靡不繼

襖不溫詎吟猶是鐘球鳴語之曰此余祕密藏中休糧方也

夷風沿濁卓生長孺履有確守困無纖累雖當粒絕終辭墓譽歸友贈言堅哉見志

杜有開

杜有開字伯陽江陰人也家貧授徒以給妻吳氏辟纒助之天曆歲歉學徒散去吳之弟繼勸鬻墓地少延飯死有開在羸憊中堅持不可繼欲挈吳歸吳曰夫能盡孝我獨不能盡婦道乎遂相繼枕藉死鄉人

憐之

伯陽碩孺度炊莫給養蒙而齋載緝以易孔殉饑
灾克全守德子經婦義斃焉弗失

張介福

張介福字子祺單懷人也從姑氏來吳少慕鄉哲許
衡遂軒軒以禮自持為學誠篤周旋規矩張士誠入
吳兵掠其舍令導諸富不從乃刃其面流血仆地復
戴冠危坐而顏色自若家素貧寒冬不具衣襦或遺
以袂絮固辭之雖小物亦不受及死語人曰吾學古

人一無所成死有餘憾矣

覃懷秀產吳邑卽旅志在希賢動能中禮白刃莫
儼素介無取小雖聞道沒猶含悔

王達

王達字志道錢塘人也足一跛家極貧無以朝夕因
賣藥賣藥復不繼又市卜博究子史百家客至輒談
今古不休人知其辨博每以疑難質之無不口應

跛者王生外歎內足山袖秦方市簾楚卜學必窮
年談唯稽牘粵義隱詞質皆彰暴

王賓

王賓字仲光吳郡人也志不願仕永樂中自壞其面
終身獨居無妻子鬚髻布袍游行市中家貧無業賣
藥以資所至羣兒隨焉郡守姚善枉謁衡門賓據坐
受拜以道誨之若師弟子姚少師廣孝貴歸來訪弗
肯見方盥掩面而走

仲光耽漁獨影窮栖毀顏佯廢編髮高嬉性偕赤
子道屈貴輿同邦企德展矣我師

邢量

邢量字用禮吳郡人也平生不娶併童僕無之弊屋
三間青苔滿壁室中唯左右古書披覽薪水躬自乘
執惟炊黍分而食焉未嘗得一煖食折錡敗席壞席
破被蕭然其居也及扣之經史傳記無弗應者客至
清淡不設湯茗有奇彥數人每謁之必挾鈔以往午
則買食他處復就談焉量以是非老

邢叟好古經紉史究室乏御令身勞井口晨炊昏
餐著麻寒覆問奇有來如鐘在叩